

Idea d'ina societad acziunara dat da discutir

Duei Sedrun Mustér Turissem vegnir transferiu d'in'uniun en ina societad acziunara?

DA HANS HUONDER / ANR

■ **Alla radunonza generala dalla Cuminonza d'interess dils possessurs da secundas habitaziuns da Tujetsch la sonda vargada ha la damonda davart la midada dalla fuorma giuridica da Sedrun Mustér Turissem procurau per discussiuns. Tonaton ein las commembras ed ils commembers dil meini che la cuminonza savessi separticipar sut circumstanziis ad in futur cussegl d'administraziun.** La nova cunvegientscha da prestaziun che las vischnauncas da Mustér e Tujetsch han fatg cun Sedrun Mustér Turissem pretenda che Sedrun Mustér Turissem seigi ina societad acziunara naven digl onn vegnent. Co igl acziunariet duei veser ora ei denton ina da pliras damondas ch'ei aunc da sclarir. La suprastanza dalla Cuminonza d'interess dils possessurs da secundas habitaziuns da Tujetsch ha gia fatg sias ponderaziuns tgei rolla ch'ella savess giugar en quella societad. «Nus havein signals dalla vischnaunca che la cuminonza vegness beneventada en quella», di la presidenta *Vreni Müller-Hemmi*. Ins ha analisau ina participaziun. Ina tala havess avantatgs, mo era disavantatgs. «Cun ina representanza el cussegl d'administraziun havessen nus da purtar responsabladad e representar il meini d'ina maioritad. Persuenter havessen nus influenza e savessen cooperar», di Müller-Hemmi. Per quei motiv ha la radunonza decidiu cun clara maioritad da demussar da principi igl interess da collaborar egl avegnir ella societad ed el cussegl d'administraziun. Alla suprastanza ei vegniu dau la competenza d'examinar in'eventuala damonda dalla vischnaunca e da far ils pass necessaris. Sco quei ch'il president da Sedrun Mustér Turissem, *Silvio Schmid*, ha detg alla radunonza sto ina tala midada d'uniun en ina societad acziunara vegnir exami-

nada fetg bein: «Ina dallas damondas centralas ei igl acziunariet, l'otra la cumposiziun dil cussegl d'administraziun. Ei fa pauc senn da midar la fuorma giuridica sch'ils medems decidan era egl avegnir. Lu san ins era restar tier in'uniun.» Per el ha la collaboraziun d'Andermatt cun Sedrun e Mustér pli gronda prioritad. L'incarica dallas vischnauncas da fundar ina societad acziunara seigi denton clara, ussa hagi ei num mirar co vinavon: «Ei savess era esser che nus discurren quella damonda aunc ina ga cun las vischnauncas.»

Il bogn vegn beneventaus

El decuors digl onn da fatschenta passau ha la suprastanza dalla cuminonza fatg denter auter ina retschera tier las commembras ed ils commembers dallas cuminonzas d'interess da secundas habitaziuns da Mustér e Tujetsch concernent il diever dil Bogn Sedrun. 78 pertschien dils possessurs da secundas habitaziuns da Tujetsch ein dil meini che quei bogn seigi fetg impurtonts ni impurtonts. A Mustér ein 69 pertschien stai da quei meini. Ins hagi vuliu saver quei damai che la vischnaunca da Tujetsch metti a disposiziun considerabels mieds finansials dallas taxas da turissem pil deficit dil bogn, respectivamein il project da sanaziun da quel. Ils 7 da settember 2019 ha in'ulteriura Scuntrada liug. Igl ei ina sentupada d'indigens e possessurs da secundas habitaziuns. Il program cumpeggia referats e visetas da menaschis sco era ina demonstraziun co ins fa capuns. Terminada vegn la sentupada cun ina marenada. Il medem di ha il festival da schlagers liug. Dapresent vegn fatg las preparativas per la surdada dil secund Cardun d'argien, il premi per menaschis ed ideas innovativas. Entochen il november sa vegnir inoltrau propostas. Per la giuria vegn aunc tschercau commembras e



Vreni Müller-Hemmi ei vegnida reeligida la sonda sco presidenta dalla Cuminonza d'interess dils possessurs da secundas habitaziuns da Tujetsch.

FOTO H. HUONDER

commembers. Alla radunonza generala la sonda suentermeizdi ei *Christina Menzel* vegnida eligida en suprastanza. Ella remplazza *Beatrice Bosshard* ch'ei sere-tratga.

Grond'activitad

Il rapport annual dalla presidenta Vreni Müller-Hemmi documentescha ch'igl onn passau ei staus detg intensiv, surtut per la suprastanza. Aschia eis ella s'engaschada denter auter per la cuntinuaziun dil menaschi dalla pendiculara sil Tgom. Davart l'Andermatt Sedrun Sport SA e la vischnaunca ei ina cuntinuaziun denton vegnida refusada cugl argument ch'ei

detti ussa duas novas pendicularas ella regiun, numnadamein quella sil Schneehüenerstock e quella sil Cuolm da Vi. Positivs ein ils discuors cul Forum cultural Tujetsch stai. Grazia a quels ein differents occurrenzas davart la historia, cultura e la tradiziun dalla Val previdas uonn. In'emprim arranschament ha liug ils 20 da fenadur 2019. Sco gia ils onns avon ei la suprastanza era s'engaschada danovamein per la trasparenza dallas finanzas, respectivamein dil diever dallas taxas da turissem e hospis. Ella beneventa la decisiun dallas vischnauncas da Tujetsch e Mustér da buca financiar pli sezzas arranschaments ord las taxas da

hospis, mobein da surschar ina contribuziun pli aulta da quella a Sedrun Mustér Turissem. Quei seigi in pass ella dretga direziun. Cun interess hagian ins era priu enconuschientscha dallas informaziuns davart la revisiun dalla lescha cantunala pertuccont las taxas turisticas. Quella pretendi dapli trasparenza dallas vischnauncas. Exact per in tal agir s'engaschi la cuminonza dapi sia fundaziun. El decuors digl onn passau han las commembras ed ils commembers retschiert quater ga informaziuns actualas dalla suprastanza. La homepage ei vegnida actualisada regularmeins ed il flyer dalla cuminonza se presenta en vestgiiu niev.

Giug senza cunfins

Las famiglias da Sevgein ein seradunadas la sonda vargada al gi da giugs

■ **(anr/ac) Ina concurrenza meins sportiva, denton tonpli divertenta organischan ils conjugals Alice ed André Bertogg mintga treis onns en favur dallas famiglias da Sevgein. La puschida ha anflau in grond resun la sonda vargada.** Ils 16 divers posts installai egl intschesch dalla halla polivalenta da Sevgein tradeschan dabia fantasia ed in grond plascher per ina concurrenza nunconvenzionala ch'empermetta dabia divertimento. Per exempel sitar cun ina pistola dad aua sin in cup pendius vid ina corda e muentar aschia il

cup dad in liug a l'auter. Tons cups sco pusseivel han ils giugadurs stuiu muentar en in cert temp ed il diember ei vegnius numerous en fuorma da puncts sin la gliesta dallas singulas equipas. Secapescha che l'aura dalla sonda vargada ha carmalau da drizzar il fil dall'aua sin in ni l'auter dils congiugadurs. Ils giugs han plidentau igl inschign da participontas e participonts. Gi da giugs numnan *Alice* ed *André Bertogg* lur puschida che plidentau las famiglias da Sevgein. E gronda reclama ston els buca far per la concurrenza, buca meins che 18

gruppas ein stadas dalla partida la sonda vargada. In affon ed in carschiu ei la pretensiun minimala per formar in'equipa, per regla ei l'entira famiglia dalla partida, pign e grond cun dabia entusiassem sin via dad in giug a l'auter. L'inspiraziun per il giug deriva neudad ina concurrenza da giugs denter equipas da differents marcaus che sennunava «Giug senza cunfins» e vegneva mintgamai emessa ella televisiun, ha André Bertogg dau d'entellir. L'iniziativa primara per il gi da giugs a Sevgein ei antruras vegnida dalla scola e la famiglia

Bertogg ei sedecidida da cuntinuar. En vesta alla gronda lavur preparatorica vegn giugau mintga treis onns. E sustegn anflan ils organisaturs davart da tatts e tats, parents ed enconuschents sco dall'uniun da giuventetgna ch'han survegliau ils giugs e nudau ils puncts. La gronda part dils posts da giugar ei creada da niev. Dabia lavur, il resun intimescha Alice ed André Bertogg adina puspei da cuntinuar e da schar reger la fantasia e crear novs giugs per il proxim event. Il vitg da Sevgein para dad esser in attractiv liug d'habitar per famiglias

giuvnas. E porscher ina plattforma da s'entupar han ils conjugals Bertogg era vuliu cun il gi da giugs. Bein noda il meglier inschign ils biars puncts, il giug final denton sebas sin cletg, aschia che mintg'equipa ha la pusseivladad da s'ender sco emprema alla meisda da premis. Premis che mintga participont al gi da giugs contribuescha sco daner da partenza. La rangaziun finala dalla sonda vargada ha gest aunc surviu sco segn da partenza dalla fiasta dil vitg da Sevgein organisada dil Chor mischedau Sevgein.



Cun eglis serrai cavigliar il tschep tenor indicaziun el dretg encarden, in giug che pretenda concentrasiun.



Han organisau igl event da giugar ch'ha anflau in grond resun: André ed Alice Bertogg.

FOTOS A. CADONAU